

PHILEMON

¹ Philemon-ai, atha Paul-ala, tjina tnakanhakanha nukanha Timothy-ala turta, pepa nhanha unkwangurna yairnama. Unta kunha tjina kangkintja pa tjina urrkapunhapunha ilirnakannya nama. Yinga lyarta jail-ala nama, atha relha ntjarrannya Krista Jesuiperra kaltjinthakalanga.

² Pepa nhanha arrkutja Apphia-aka turta nama, tjina tnakanhakanha nurnakanhaka. Era turta artwa Archippus-aka nama. Era kunha nurnakalela urrkapuma, Kristakakwa. Era turta worlamparinya etnaka nama, etnala kutatha iltha unkwanganhala worlerrama.

³ Altjirra Kaarta nurnakanha, Ingkarta Jesua Kristannya turta, rrakangkarra ngwanga pa rilhera ntelalhama.

*Paul-ala Altjirranha dangkilaka, Philemon-
annya artwa kangkintja namanga*

⁴ Philemon-ai, yinga Altjirurna ingkamalanga, yinga unkwanga ilpangkama, atha turta Altjirra nukannya kutatha unkwangakwa dangkilama.

⁵ Atha wumakwa unta Ingkarta Jesuanha tnakamanga, unta turta relha alknaltara ntjar-raka kangkintja ntelalhamanga.

⁶ Yingantama ingkama unta relha arrpunha ntjarrannya ilitjina unta Jesuanha tnakamanga. Untarrrpa turtantama kathalkura lhangkaritjina Kristala ngannya kuta ntarntaramanga.

⁷ Tjina nukai, unta yinganha kngarra arrkani-laka, alkngolkngilaka turta, nuka kangkamala. Unta relha alkngaltara ntjarranha turta tjipatjip-ilaka.

Paul-anha Philemon-urna ingkaka Onesimus-akakwaia

⁸ Yinga Kristaka urrpia namanga warta, atha nganha kala turnamaranta.

⁹ Yinga pula unkwangurna ingkamatitja, unta tjina kangkintja namanga. Arai, yinga Paul kala kngarripatantama nama. Yinga turta Krista Jesuakakwaia jail-ala nama.

¹⁰ Yinga unkwangurna ingkama, Onesimus-akakwaia. Era worra nuka ngerra inthorrerraka, yinga jail-ala namalanga.

¹¹ Arrkurla nhanga era urrkapunhapunha karningka, irtirta turta naka. Lyarta pula era urrkapunhapunha tjiparrantama nama, unkwanga, nuka turta.

¹² Athantama erinha unkwangurna yair-nitjalpuma, worra kangkintja nuka erinha purrama.

¹³ Atha erinha tnyinitjika antja naka, era katha unkwanganhala nuka tangitjala nitjinanga, yinga Yia Marrakakwaia jail-ala namalanga.

¹⁴ Yinga pula porerraka erinha unkwanganga rakitjika ngerra. Yinga antja untarrpa erinha yinganha nthitjika, unta paka nuka kangkamanga.

¹⁵ Thunga Onesimus-ala nganha kurrka wara impurlalhaka, era lyartanga kala kutantantama unkwangalela nitjinanga.

16 Itja pula urrkapunhapunha ngerranta. Tjina tnakanhakanha ngerra turta pula. Era kala tjina kngarra nukannya nama. Era kala tjina kngarra unkwanganha turtantama nitjina.

17 Yinga paka nthurra tjina kngarra unkwanganha namanga, unta erinha inetnai, untala yinganha inamara ngerra.

18 Era paka yulthalka unkwanganga nyilkn-gala inakalanga, atha ngannya nannya kala nthitjalputjina.

19 Atharrpantama nannya intalhelama: ATHA PAUL-ALA NGANHA NTHURRA INTHORRA NTHITJALPUTJINA. Untarra pula kala kaltja, unkwangathaka nama yinganha kngarra kapanha nthitjika. Atha kunha ngannya Kristurna rretjingakala.

20 Tjina nukai, Ingkartakakwia nuka kangkwerrai. Kristakakwia turta yinganha tjipattjipilai.

21 Atha pepa nannya unkwangurna yairnama, yinga kaltjanga warta unta nuka kangkwerritjina, Onesimus-annya turta nukurna yairnitjalputjina.

22 Nyinta wotha. Nuka pmara mpaarau! Yingatata kaaralhama rrankangkarrurna wotha alputjika, rrankarra nukakwia Altjirurna ingkagalanga.

Anparnintja

23 Artwa Epaphras, erala nukalela jail-ala namanga, Krista Jesuakakwia, era rrankarrannya anparnama.

²⁴ Artwa tjina urrkapunhapunha nhanha ntjar-
rala turta rrangkarranha anparnama, Mark-ala,
Aristarchus-ala, Demas-ala, Luke-ala turta.

²⁵ Ingkarta nurnakanha Jesua Kristanha
rrakangkarra ingkarrakaka kuta ngwanga
ntelalhama.

**Altjirraka angkatja - Arrarnturna
kngartiwukala
The New Testament in the Western Arrarnta
language of Australia**

copyright © 1997 Bible Society of Australia

Language: Western Arrarnta (Arrarnta, Western)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-05-14

PDF generated using Haiola and XeLaTeX on 18 Apr 2025 from source files dated 31 Aug 2023

e7dac67a-727e-547f-9edb-55e6c28bb3b9